

出使美日秘國日記

出使美日祕崔日記

光緒十九年正月初一日晴

朝賀辰初設麪申正設醺 查美國入口稅自一千八百九十一年即光緒十七年至今擇有關係者詳列之計白米每磅征稅銀二分大麥每磅征稅銀二分豆餅每原本銀一圓征稅銀四角五分豆每原本銀一圓征稅銀四角五分燕窩每原本銀一圓征稅銀二角無花瓷器每原本銀一圓征稅銀四角五分有花瓷器每原本銀一圓征稅銀六角布疋每原本銀一圓征稅銀四角綿衣每原本銀一圓征稅銀五角絲綢每原本銀一圓征稅銀六角綢帽每原本銀一圓征稅銀六角絨帽每原本銀一圓征稅銀六角

火腿每磅征稅銀五分墨每原本銀一圓征稅銀三角熟洋藥每
磅征稅銀十二圓紙張每原本銀一圓征稅銀貳角五分絲綫每
原本銀一圓征稅銀三角帽結每原本銀一圓征稅銀五角生絲
未織者每原本銀一圓征稅銀五角辯綫每原本銀一圓征稅銀
五角絲巾每原本銀一圓征稅銀六角綢鞋每原本銀一圓征稅
銀五角酒每加倫征稅銀二圓五角另每玻璃瓶一箇征稅銀三
分 因查中國每米一石重一百五十斤以每斤十六兩乘之爲
二千四百兩以每磅十二兩分之爲二百磅每磅征稅銀二分則
每米一石征洋銀四圓已過成本矣中國若以美國之征米稅者
征美國之麪稅名正言順也布疋原本一圓者征稅銀四角方今

美國之布入中國者奚啻成本銀二三千萬兩中國卽以美國所征於中國者征美國之布稅亦名正言順也

初二日雪

查光緒初年中國貨物運入美國者每年白米二百零五十三萬三千包每包五十磅生油八萬三千二百八十箱每箱八十磅雜貨四十五萬一千九百五十件洋煙四千五百九十箱每箱五百兩至光緒十七年則白米六十六萬六千五百包生油三萬三千九百一十箱雜貨一十四萬七千三百一十九件洋煙一千五百六十二箱因按米每包五十磅每磅征銀二分合銀一圓二百零五十三萬三千包卽征二百零五十三萬三千圓洋煙四千五

百九十箱每箱五百兩卽征銀五百圓共征銀二百餘萬圓此二項者已征銀七百餘萬圓益以他項之稅當可過一千萬圓中國所征入口之稅統各國而計之不上銀二千萬兩美國所征於中國一國者已如是其多宜其足用也至近年之米入美口者較前僅六分之一洋煙則三分之一又可見粵人之嗜好焉

初三日晴中夜大風如吼

考見在軍務言防則需鐵甲礮臺一臺以銀數百萬計百噸之礮千磅之彈一礮以銀十萬計一試演以銀數百數千兩計言戰則水師需萬噸之艦一艦以銀數百萬計新式水雷船一船以銀萬兩計陸軍川槍一槍以銀十餘兩計養兵需百萬或二三百萬人

卽以自萬計之

二俄英三法德奧義皆

每年需兵餉銀三四千萬兩而

軍械馬乾仍未計焉其調兵以鐵路鐵路一里以銀一萬兩計夫古之行軍者水戰不過艤艫下瀨陸戰不過弓矢戈矛築紫不過土石守隘不過城濠調兵不過數萬其軍費視今千百分之一耳今則千百倍之非國帑充盈安能次第興舉然則居今日而欲挽積弱之勢杜外侮之來振自主之權洗從前之恥母爲高論但蔽一言苟欲圖強當先圖富

初四日晴

二十六日伯林來電言俄國政府擬派水師一隊屆期赴美國會操之約已有諭旨道經法國海岸不必入口停輪德國聞之甚喜

而法人甚不快心云 因按德法爲讎敵德之國勢右法而左俄
俄與法合則兩面受敵以一德而敵法俄實慮兵力不足故與義
奧聯盟又慮義奧不足恃故德主謀增兵額以自固乃俄法之交
適離此德之幸也法無俄助則力不足以勝德平日搶攘爲傑者
乃終不能復讎其情難堪宜其心不快矣

初五日晴中夜大雪

謁上議紳可六聞巴拿馬開河事中轍後美商卽於尼格拉姑中
墨洲小國開掘事在必成而墨西哥之提灣地辟地方自西至東
計二百五十米合中里八百里零前三十年英商曾築鐵路因其
地低處積水高處重厓畏難而止數月後接辦者僅造成數米亦

中止近美國希卡果富商又復開造人衆工速已成二百一十米計三月內可以竣工此路成後巴拿馬鐵路公司不能專擅其利矣 因於鐵路一事留心者二十年昔之所聞今之所見證以美國公正官紳之所言及其听夕之所圖維紳商之所竭力共爲裕國裕商信而有徵誠富強之第一策也

初六日 晴中夜大雪

謁副外部華頓查問前此所商總察院展期散院一節華頓云業已函商又詢美國既開尼格拉之河又造墨西哥鐵路不畏多費耶華頓云美國太平洋一帶土宜播種收成甚豐如不運出則穀賤傷農若運往歐洲而由紐約則火車一萬里運費太巨成本已

重何能銷售此兩路通後則東西洋無阻隔舟至香港較山蘇彝士河可省路一千米較環南墨洲可省路八千米較環阿非利加洲可省路四千米水程迅速則百貨流通而利源浚矣 因按美國之所籌如此宜其富也太平洋一帶土宜似與四川相似地廣人稀又與東三省西藏相似因願以美國之所籌者爲四川東三省西藏籌之民可使富也

初七日晴

梅律師來言科士達明日赴歐洲約同送行因答以已擬必往又言美水師部新造鐵艦所需鋼甲六千七百噸已由議院議撥銀四百萬圓招商製造現惟賓省比士堡埠之家尼記及畢司里岸

兩鐵廠能造其價值則鋼甲每噸計銀五百二十五圓至六百七十五圓不等云 因按古之言治者謂兵事不休四民失業似強之有礙於富也因以爲當今之世其言實不盡然蓋鐵艦鐵路槍礮戰事所必需花費又甚鉅其購諸他國者以銀易鐵久則國貧斯言是也然使開礦以煉鐵設局以造船械鐵路槍礮利之興於地者無盡製造之資乎工者益多既無曠土遊民矣復以其餘售諸他國若英美若德法固強富相兼焉且國有製造之廠軍械取諸宮中不資於人則敵國畏之不敢侵侮是并以保昇平增富庶又何至患貧哉

初八日晴

赴外部衙門送科士達行見華頓又至車廠送行則歐墨兩洲各國公使均集因與德使火把根談最久以其能爲華言也因言科士達此行爲祕林海事可謂盤根錯節事其濟乎火把根言殊不易也或幸而濟非半年不爲功且必有報施方可耳又聞美國以英屬卡拿大苛征美民身稅貨稅去年亦以此例報復卡拿大商民苦之議廢舊章本日已見諸英公使暨美外部來往公文知卡省實已革除苛例美國報復之例亦革除矣因按交涉之道不外抵制報施以怨報怨爲抵制以德報德爲報施弱國有不言抵制者苦於弱也強國有不講報施者恃其強也此中機械無國不有無時不然先事講求而後臨事有把握也

初九日晴

謁梅律司又謁金山華商所延之大律師博郎告以總察院展期散院事已託外部轉商博郎答云以前數日布置少暇今漸妥矣又言中國地利未闢商務未興故患人滿其實人卽生財之本也美國人數日益地利日興每兩月中卽增客民十萬何至難容十萬華人其所以不容者工黨妒之耳美初興鐵路時材料購自英國以後能自煉鋼卽不取材異地向產棉花運英織布復載回美今亦自織俄國版圖數倍於美而禁糧食出口美之麥麪徧行歐亞兩洲由地利興而鐵路廣耳中國之民雖游惰者多然亦半由無業若鐵路成地利闢鼓舞而作興之彼游惰者皆化爲勤卽庶

者可加以富又何必遠適異國而爲人所厭憎哉因答曰然歸而誌之

初十日晴酉刻小雨

初三日巴黎來電言德法爲讎相持未決而英法交涉又多齟齬因埃及國主更換部臣英人以勢迫其撤退法政府以英無理詰問英廷英人自知理屈不能回覆乃引他事詰問法國蓋法國近於地中海卑疏達地方創建礮臺其地與義國對岸義廷業已詰問茲英國助義國會同詰問共意欲使法國應接不暇耳因按此抵制之法也古之人有行之者楚國請晉楚之從交相見晉國答以秦君朝晉則齊君朝楚此兩強之相抵也晉徵鄭朝而鄭以

翦爲仇讎對之此弱之抵強也魯欲與會而晉以南蒯子仲恐之此強之抵弱也至於秦索趙地而趙亦索秦城合縱成而秦兵不出關連橫成而六國遂日削春秋戰國之世大抵如是數之不能終焉

十一日晴

英屬卡拿大地方與美毗連向例於華人入口按名征身稅銀五十圓本年議紳創議征稅按名加至五百圓及至會議則不以加稅爲是者多於加稅之紳一名遂止 因按華人至卡拿大爲入美地步故英人藉之以爲利凡到境者征身稅五十圓既征後離境而重來者仍征稅如舊行之久矣自美國倡領照註冊之例華

人觀望不前到者遂寡故又議加稅以期所征之不減於前乃以議紳意見各殊而止然度此例終必行也無抵制故也

十二日 細雨竟日

赴上議紳海耳茶會海耳不附工黨者也總察院穀福不徠之福夫婦等均到聞墨西哥公使日內亦可到美又聞美國之民在墨國謀生者甚衆與土民極相安其業以造鐵路開礦爲大宗鐵路之事美商十居八九又購荒地開墾以種茄非均獲利焉 因按美國不患人滿而其民願赴墨則墨國之有利可知顧創始易而守成難美國草昧初開資華人如手足及各國之民羣集本國之利已興則又議禁逐華人以獨有其利免死犬烹鳥盡弓藏此前

事之可鑒者然則墨國招徠華人華人羣趨墨國誠不可無約以善其後免至鵠巢成而鳩佔之也

十三日晴

赴副總統莫屯茶會此會專爲宴新副總統夫婦而設因亥初往見兩副總統夫婦又見各國公使回車已子正矣聞英國船廠新制成大輪船二艘已成其一計長六十二丈寬六丈五尺容一萬二千噸中分十六隔艙雖偶受傷亦不至沈將以來往大西洋云因於是見機器之用大也凡造巨物非人力所能施一礮而重百噸一船而容萬噸一鐵鏈而重萬斤一鐵板而厚三尺皆非機器不能制造非機器不能運用也因嘗以驗槍親歷各廠見其鋸

鐵如鋸木剪鐵如剪紙槍面之陰文洋字非鑿非鑽直以鋼戳作小圓輪以機器之力壓於槍管之上輪一轉而字已成矣

十四日晴

墨西哥公使來見言立約之事且云聞新使將到此約應需後任成功因答以先商規模可也 美國向例守局外凡遇各國戰事均不干預查上年七月南墨洲之閩都拉國內亂美有商船名卑薩地者以購香蕉爲名至閩國改爲兵船既爲轉運官兵軍火並助攻擊叛黨轟沈叛黨兵船一艘閩亂遂平惟未奉美廷之命擅川美旗助戰殊違美國國例該船現已被控查辦云 因按美國國例無所偏袒固甚善也但墨洲情形今已殊昔南墨洲小國自

主之後英法覬覦終必盡之爲美計者與英法爲鄰不如與小國爲鄰也檀香山今年亦以內亂願隸美國版圖聞總統外部已允而議院多有不以爲然者未知作何處置也 副總統辭行遂赴副總統宅送行

十五日 晴中夜雪

各國公使見美總統是日爲時不久見後僅由義公使作周旋語卽各散十二日巴黎來電言雲南瀾滄江上下已爲法有惟米江尙屬暹羅江右屬越南境有議紳名衣丁尼者建言謂宜踞爲法屬十三日又有電言印度洋之客吉島向由法人覓得近日法兵艦已在該島建旗示爲法屬因該島產煤云 因按自各國分裂

阿洲後而風氣又不同英法德各國競佔小島爲已有卽美之不貪他國土地者亦欲購聖駝馬島借海代國埠爭檀香山地矣蓋自英之屬地徧於地球而商務遂甲於各國天下莫強各國知其然也遂起而效之雖以俄之向恃陸軍稱雄者亦亟亟焉以增強水師爲事過此以往小弱之國先亡愈小弱之國愈先亡亦猶周之春秋將并而爲戰國矣

十六日 大雪

是日爲西歷三月四號向例美國總統四年一換本年適屆四年之期外部於先三日來函并送到入議院門票訂公使參贊繙譯等員同往觀禮隨員學生不與焉已正往至議院門驗票後導入

客廳此廳以花紋石造成如大理石棟梁柱礎牆壁一律各國公使均到至午初入議院堂上下議院紳均齊集眷屬則坐樓上舊副總統已先到正中南面坐新副總統由左升座舊副總統與言國事新副總統唯唯言良久舊者退自右下新者乃入座亦正中南面坐至午正舊總統與新總統並行而入並坐於臺下右爲總察院九人左爲各部長坐定教士於臺上右偏宣讀舊章言新總統應接任視事兩總統均無言逾時新舊總統四人先出議院頭門衆隨之至門外已搭臺臺下民萬人臺外兵五萬人四總統一總察院入中堂均坐惟新總統立而語臺下謂伊爲民所舉當以保民爲心所欲與聚所惡勿施本此義而衍之甚長約半時總察

院起立以耶穌教本授新總統新總統受而矢誓乃散兩總統同車兩副總統同車皆四馬至總統宮兩新總統入宮兩舊總統返宅兩新總統遂出宮門上臺閱兵各國公使與焉閱畢各散已交戌初天色昏矣義大利西班牙俄羅斯朝鮮各公使均不赴閱兵之會中夜於養兵院跳舞新總統亦到無論何色人均可到因未赴

十七日晴

泥格拉中墨洲小國也兩面瀕東西洋國中有大湖水程極便爲通商孔道鐵路輪船之利甚厚各國均欲之茲聞該國現已將此項利益准英人獨佔云 因赴祕魯道經厄瓜多國知墨洲小國

英人多操其利權祕魯國入款已准英人收六十年以還國債厄瓜多國商利英人霸之茲泥格拉又拱手而與英人矣方今時勢與昔迥殊其并人之國也不削其位號不強其服事不爭其朝貢惟藉通商以奪其利權腴其脂膏利權去而空名自不能存則拱手而讓之間有不願而拒之者則無餉可籌其兵亦不能戰兵艦一臨如發蒙振落耳吁可畏哉

十八日晴

美國駐華兵艦名麥林巡海至琿春查得俄主之於琿春埠極意經營不惜鉅貲築城濬濠次第興舉其造西比利亞之鐵路亦爲將來疆場之事使彼德堡與琿春聲勢相連大約五年之內必可

成功琿春礮臺水師兵房均不准外人往觀故不得其中詳細該
埠之兵四千人皆按日操練可稱勁旅埠外有兵艦六艘駐守云
因觀於此而歎琿春地方已爲俄國之重鎮也俄人造西比利
亞鐵路揚言於衆以爲通商因卽不信蓋苦寒之地所產無多安
有大利可興惟其國勢兵力偏重歐洲而歐洲無隙可抵故興鐵
路使通兵力於亞洲然後左顧右盼使其蠶食之謀爲之鄰者當
思所以備之矣

十九日晴

謁梅律師商照會外部事聞新總統新派各部大臣已由議院議
准外部葛禮山戶部愷來爾兵部拉門郵政部皮才爾律政部渥

耐水師部黑白內部司米市農部馬頓 因按新總統爲南黨所
用部臣皆南黨惟爲禮山爲北黨然亦棄北黨而歸南黨者也美
國向例總統易則各部皆易不獨南北黨之不相假借卽新舊任
同一黨亦不用舊任之人也總統之位如傳舍部臣之置如弈碁
而其國不亂者則以立政之權歸議院守政之權歸察院議院之
紳舉自民不由總統察院必老成碩望始充是職受職以後則終
其身於位而不遷移故其人皆無所希冀亦無所阿附此兩院者
實美國之根柢綱維其長治久安者此也

二十日晴

赴新派各部長處道喜至墨公使宅答拜 美國考究家考得歐

洲各國練兵制器精益求精共知共見而國有軍務不獨良兵良將淬厲在先卽餉項亦須先備因考德國所蓄之欸其藏諸伯林都城司班刀礮臺中者計銀三萬萬圓法國則銀四萬萬圓俄雖頻年饑饉而所儲最巨計銀四萬二千五百萬圓奧則一萬五千萬圓皆非軍務不得擅動義無所蓄須籌於臨時苟有戰局難久支持云 因嘗考歐洲戰局法國拿破侖第一以八十萬人攻俄幾於隻輪無返俄土之戰殺人七十萬德法之戰殺人五十萬南北花旗之戰殺人三十萬以其殺人之衆卽知其兵數之多以其兵數之多卽知其餉項之巨矣武王伐殷車三百兩士三千人而晉楚城濮之戰已增至車七百乘平邱之會又增至四千乘秦王

滅楚則增至六十萬人始終八百年間風氣卽已迥異則墨守之見不足與論時也

二十一日

卯刻雨已初見日

外部訂見各國公使人員午正各公使均到葛禮山一一握手爲禮查葛禮山業律師當南北花旗戰事曾充兵官槍彈傷其右脛故行時微跛云 因按新總統基利芬卽四年前之總統自光緒十四年退位遂充律師光緒十七年曾至華盛頓爲人駁例而不得直此次退位之總統哈利順亦係律師退位後充書院大教習前任外部長科士達以律師而充外部卸任後仍充律師赴英法辦祕林海峽案今外部長又以律師而任是職美國之重律師如

此以其熟於國家掌故并諳交涉之事也

二十二日 晴大風夜雨

上年十二月三十日馬得力來電言日廷因入不敷出力求節省因減出使之費駐墨洲小國之公使可撤者撤之駐美公使之隨員可裁者裁之又裁去駐巴爾底馬黑利法刻士三埠之領事本月十七日南墨洲之烏拉乖國亦以經費支絀裁撤駐各國之使館厄瓜多國現以貧故議將太平洋卡拉佩戈士之諸島賣與德國爲德國兵艦添煤之埠云 因嘗言當今之時如周之春秋將變而爲戰國也自通商之局開小弱之國不能閉關自守如中人家日與豪門鬪富鮮不傾矣明者知其然故急謀興利練兵以

自固計此一百年間若美若德皆勃然而興若義若日則弛然而弱法則時振時蹶英則日富日強俄國強而未富然其入欵猶與英德美法頡頏且日興鐵路辟土地亦可畏哉盛衰相倚伏盛者非無故而盛衰者非無故而衰也知其所以然則盛者不衰而衰者可以盛矣

二十三日雨

昨日伯林來電言接東阿洲信德國駐游壬曾拉國之兵與土民接戰獲勝斃土民甚衆奪獲軍器甚多德兵傷亡僅數人焉查一千八百九十一年德兵爲土人所敗亡三百人兵官亦歿軍器悉失如是者非一次一處德人遂視爲畏途此次大勝後軍氣已壯

土人懾服矣 因按德國陸兵素稱勁旅乃屢敗於阿洲則阿洲非無人焉又查前此德兵之敗實因阿洲土人有英將施旦來爲之主謀益以主客多寡之形故不能敵自德與英說合謀定後動而土人遂不支乃知新練之衆不能敵久練之軍而將兵者非其人亦不能操勝算然則練兵不易而選將尤難非籌之有素必不及矣

二十四日晴

上譚紳英吉利士來辭行年七旬餘矣係英人入美籍因以其不附工黨立往答拜相見後言本日酉刻卽附火車回本省回省後亦必駁論禁華工例也因謝之又言上月二十六日倫敦來電英

國政事下議院之權日重上議院雖屬有爵位之家竟不能與爭
權甚至羣詆上議院謂其不知民事而欲廢棄云 因按地球各
國有君主者有民主者有君民共主者亞細亞洲若中若俄若土
耳其若日本若朝鮮皆君主也土耳其版圖向跨三洲而近年日
削在亞洲者已微日本新改爲君民共主而究其權仍在於君至
於墨洲之國則皆民主歐洲之瑞士法蘭西亦爲民主若巴西若
檀香山皆新改爲民主者法則變革不常自爲德所挫後復改爲
民主焉若英若德若奧若義若和蘭若比利時若瑞典若那威若
葡萄牙皆君民共主者大抵君民共主與民主之國其大權皆在
議院惟君民共主者君意與議院歧可以散議院而令再謬民主

之國則不能此中又有分別矣

二十五日晴

照會美外部駁詰禁工新例是夕赴梅律師處屬其默託戶部且勿拘人又聞三十日倫敦來電言向來由美赴英之輪船以英國利威布海口爲總滙之區乃近年以該海口不如受漢頓海口之近倫敦遂改於受漢頓海口總滙茲英國防美公司望斷將奪其利權特設火車凡輪船之滙於利威布者所載搭客卽由火車迅赴倫敦以冀便捷云 因按趨利乘便者人情之常不能禁也孫武子云善戰者因其勢而利導之管子云政在順民心美國輪船改由近倫敦之海口附船之人自便之則利權爲所專矣英人不

能禁之而思所以爭之則惟有更求便捷之法美自不能專其利焉今地球各國立約均以通商爲名夫曰通商固必有通商之道也彼等皆鬬智鬬巧者此其一端耳

二十六日晴

二十四日祕魯來電言俄世子坐羅達兵艦已抵祕國又言俄國現造西比利亞之鐵路最爲上緊一以利便軍務一以遷徙貧民亞洲內地沃壤多荒既有鐵路徙各省窮民於此使之開墾可以足食將來糧產豐盈運之出口亦易其鐵路所過之地無高山大川每一米祇需銀二萬九千圓云 因查俄世子已遊歷歐洲亞洲今又遊墨洲矣西比利亞鐵路俄人自言益於商務他國均謂

便於行軍平心而論商務固非全無益也惟俄好兼并爲之鄰者均有戒心且其鐵路通至琿春已臨中國邊界亞洲各國又爲俄人素所覬覦俄人又好左衝右突不耀德而耀兵各國謂其便於行軍實誅心之論矣顧其事煩重非可遽能指麾如意故於軍事未見端倪稽之往古漢武帝之通西域晉王濬之造樓船其意何居可徵諸前事焉

二十七日晴

上議院紳麥化順訂於本宅見副總統因偕繙譯於戌初往至則副總統已到議紳陸續而到各國公使惟見英德日本及墨洲各國數人有名撒拉芬者自言昔充兵艦帶兵官曾至天津見李傅

相極苛傳相相待之倭麥化順向詆蓋力禁華工之例以爲違約并詢中國已興鐵路信否因答以京北現已開辦直隸省開礦之處久已興造現亦推廣此外湖北河南通京之路方議合辦尙待興工麥化順曰中國民數至多礦產至富民俗儉樸而耐勞如能大興鐵路不過六十年必能立致富強冠於地球諸國又中國災祲屢見議蠲議振報不絕書究之振蠲之補苴不足拯救於萬一如有鐵路利之出於地者日闢民之食其力者日多戶有蓋藏何至遇偏災而不給哉因領之回館已亥正矣因按鐵路之富國足民實無疑義且其益并不止此曾疏陳矣美國富強之驟實本鐵路凡公正官紳憤苛例之違約者皆爲因剴切言之此又其一

也

二十八日晴

昨晚上議紳及布生可六等均係向詆禁工者晤言最久言日本政府以俄人造西比利亞鐵路格外趲緊以爲可慮上年曾派駐德使館之隨員武弁山德都乘馬自陸路赴西比利亞沿路察看并照會俄廷保護該武弁已行抵瀕東洋之烏拉地崗司鐸海口云 因查俄造西比利亞之鐵路各國均有戒心光緒十六年英德各派兵船至琿春十七年美國亦如之上年日本又派武員至西比利亞蓋英人防其爭亞洲之形勢奪蘇彝士河之利權美則以烏拉地崗司鐸近瀕大東洋德日係近鄰一慮其調兵轉餉之

易一慮其蠶食之易也且日本之唐太島已爲俄所據矣其能無戒心哉

二十九日大雪至地卽化樹上稍留寸許

俄戶部會計今年出入兩欸出欸溢二百兆羅布無可彌縫擬節省水師經費二十兆鐵路經費三十兆仍短一百五十兆則擬加征內地稅項整頓鹽課又恐大饑之後饑民不堪重稅則擬借貸惟歐洲各國富商多係猶太人俄人近年待之太刻招怨已深猶太人已相約不肯借貸現籌措頗難云 因按俄之入欸亦計銀三萬萬餘兩與英法美德頗頗而入不敷出者則以建鐵路興戰艦增兵額爲費太多也交國債之息太鉅也其強雖亞於英其富

實不敵諸大國蓋祇知兼并開邊而不知持盈保泰此國用所以
不給也然猶幸其國用不給不能逞欲以肆其封故民生之禍稍
緩否則爲之鄰者防不勝防矣

二月初一日晴雪已消盡感冒

中初各國公使見總統義大利墨西哥兩公使資格最深總統與
立談數分時又與英公使立談一分時其餘握手點首而已聞正
月二十六日俄都來電言中國將派兵赴巴馬爾境俄亦派步兵
二隊礮兵一隊於西歷四月趕到巴馬爾境英國以俄已佔巴馬
爾特於印度邊界之氣拉土城建造礮臺添兵駐守蓋氣城實由
巴馬爾赴印度之要隘也該地土人羣起攻英爲英所敗傷斃二

百名云 因按俄踞巴馬爾境已閱一年度非空言詰責所能止也印度者英之外府卽鴉片一項每年賸削中國者計銀四五千萬兩其地近俄此俄人所垂涎者此外若新金山若卡拿大均隔大海俄水師弱於英力不能及亦不覬覦然則熟審彼己之勢俄之所欲得者印度英之所恐失者亦印度也

初二日晴

美國賽會德國以極大電燈赴會前已聞而誌之茲聞克虜伯廠已造成巨礮一尊由輪船運赴會所查此礮重一百二十四噸合中國十九萬餘觔口徑一尺九寸長四丈六尺二寸及遠十二米合中國三十六里有餘容火藥七百磅彈重二千磅三十里之

間可洞穿厚二尺之鋼板其彈子一顆需費一千五百圓每放一次需銀一千六百圓云 因按德國前曾以重百頓之鐵塊赴英賽會今僅十年而礮之重又過之足見其製造之日進矣地球各國惟俄國克龍斯達的礮臺鐵甲厚四尺八寸餘無間焉則此外之臺均不足當其轟擊矣戰船鐵甲太厚則沈是現時鐵艦亦未有能當之者矣百頓之礮價銀十萬兩茲又增巨則價必過於十萬矣試放一次需銀一千餘兩欲其命中非熟不能則試演之費又巨萬矣苟非國帑之充安能給於用哉

初三日晴

美外部新准美國駐墨西哥公使電文言墨廷於上年六月出示

凡粟豆兩項向免入口稅者今復征收又威內薩國於美國運入之下等豬油均加重稅云 因按墨西哥處北墨洲威內薩處南墨洲一極貧一極弱墨之民數不及十兆威尤少矣乃其於收稅均有自主之權故稅可以減可以增可以減而復增蓋以物產之豐歉無常國用之盈虛難定有心者必維持調護於其間乃不至以利權予敵國而使敵國操利權也如以務財用者爲小人而鄙而不言是任他人之賤削而以爲無關痛癢可乎哉古人有言曰磨礮砥礪不見其削有時而盡吁可畏也

初四日陰

上月二十三日可倫國來電言英國駐哥打城公使傲狠無禮侮

辱其民各塾學生散館稍失禮貌卽批其頰國人恨之近日乘英使騎馬出遊勒令下馬辱之二十八日倫敦來電言美國駐摩洛哥之領事出遊爲人所毆幾有性命之憂摩政府贈銀五百圓作爲養傷之費二十九日羅馬來電言義都美國使館爲匪人炸藥所轟公使巴打幸未傷斃云 因按近年公使領事不洽之案層見疊出光緒十四年英國駐美公使以干預保舉總統事爲美斥回法參贊調古巴爲美國醫生所控扣留行李比利時公使以避暑至遠村馳馬爲巡捕扣其車瑞士公使以避暑處鄉村爲婦女所控遽交巡捕美駐智利國公使伊干智利以兵圍其使館派赴日國加羅蘭島領事日國不肯接待法國日報詆辱公使而德國

遂撤回其使各國公使亦有責言自通商局創而交涉之事多齟齬之端亦多兩強相遇尙得其平若一弱一強則鮮有平允者蓋陽示和好而陰肆欺陵耳

初五日

陰夜雨

美外部送到限制歐洲客民入境新例一冊其中查察之法較前加嚴大抵名爲防疫實係禁錮於未上船之先查明籍貫年貌有無資財有無疾病男女有無室家其赴美國有無親戚有無事業是否作工八口之後再由稅關查勘不合例者不准登岸又載此例專爲限制歐洲各國入口窮人與華工無涉云 因駐美國三年又半美國限制客民入境之例無年不與大抵限歐人寬而限

華人嚴其從寬者防其抵制也然十年以前美國之禁華工亦未嘗不寬也被固嘗試云耳敵人之犯境也可入則入可深入則深入必不可入則卷旗收隊而退美國限制之例亦如是焉已矣各國聽其所爲則將加嚴不聽其所爲則將從緩或顯予抵制而使美國之商民教士不安於各國則惟有反汗而已祕林海峽捕魚卡拿大墨西哥加稅共前鑒也

初六日 小雨

接美外部來文言所請致意律政部將來於西曆五月散院之期少緩半月俟華人之被拘者提案上審以評新例之是非律政部業已允矣外部葛禮山答拜聞近來墨洲各國殊少昇平智利內

亂又因殺美兵船水手幾致決裂賠卹結案今又與玻利斐亞爭界不和泥格拉國與哥司答立憂國爭界失和山度明哥之民以其總統以國內利權授美爲亂巴西內亂城多失守迫勅亂黨入阿鎮丹國竟與阿國邊兵接仗以致決裂又與義國齟齬義已派兵船臨境恐之海代國以拘禁美商爲美所脅瓜的馬拉以亂民擊傷英公使之子英船封其海口吉白海島國已爲英所滅檀香山島國已爲美所有墨洲事日亟云 因按墨洲除美國外餘皆小國能自立者惟智利耳餘則自郅以下承平之日尙可支持蠻觸相爭亦或無恙乃歐洲各國環而垂涎美亦不能不動則將如漢陽諸姬矣

初七日晴

美國水軍武員名費士克留心輪船海面駛行欲知敵人之船離本船之遠近近創一機器精巧異常以之測量不差分寸用之戰艦其益甚多蓋能知敵船相距之分寸則彈藥無空發而開花礮并可從空而入煙通矣現在歐洲兵艦購此器者甚多美國家已獎以金牌矣 因查春坎礮彈自上落下恒以礮口之斜度爲落下之處之度衝船之衝必熟審兩船相距之遠近作勢然後可洞敵船之脅惟海面寥廓目力失常以意度之殊不足準有鏡測量自有把握矣賞以金牌所以勸後也

初八日晴

昨日伯林來電言近年歐洲各國軍械制作日精槍彈所及無堅
不破弁兵雖有護身鐵甲均不能當茲德國之閔寒埠有人思得
妙法新創藥水以此水汕透戰衣槍彈卽難透穿經德國兵部試
驗置此衣於三百英尺之外然槍擊之均不能透惟三百英尺之
內彈之銳氣所及衣雖不穿人雖不斃恐亦難免受傷德兵部以
爲可用已令照造備用云 因嘗聞雲南深崖產一種草編之爲
牌可禦槍彈又閱紀文達五種言古董家瓷器一片可以避槍或
試之而不驗或并不敢一試大抵皆空言也德國新創藥水未必
如是之奇然以電綫氣毬等用推之當非誑語但使能阻槍彈之
力則民生之劫數亦輕因深願共言之驗焉

初九日晴

美國派充各國公使以二等爲止本年議院改章以各國駐美公使有願派頭等者美國亦派頭等以爲報施茲英國駐美二等公使彭士芬已由英廷改爲頭等次日法國駐美之二等公使亦改爲頭等查各國駐美公使以義使法伐資格爲最深故爲首領其次則墨使羅麥羅自英使改爲頭等不復與二等比資於是各國公使赴英使館道喜時義公使已在廣衆之前告退首領云 因按頭等公使有徑見所駐國君之權體至崇任至重也惟民主之國向所未設故美雖大國而派往各國之使與各國派來之使頭等公使皆闕如今美既改章英法遂卽改章將來俄德奧義亦必

改章而頭等公使遂多矣

初十日晴

初八日倫敦來電言英國議院紳士向無薪俸近日改章每人每日給俸銀三圓六角云 因按每日三圓六角每年共一千三百圓較美國議紳僅三之一耳因查美爲富國外外部大臣每年銀八千圓副者四千圓又副者二千圓西班牙國所派頭等公使俸四千圓另公使公費一萬六千圓頭等參贊二千八百圓二等二千圓三等一千四百圓隨員六百圓共駐中國爲二等第一公使俸銀三千圓公使公費七千五百圓頭等參贊一員俸三千員三等二員共三千二百圓繙譯一員一千八百圓總領事一員三千五

百圓領事一員二千五百圓副領事一員一千五百圓均按年計
川資信資電費館舍鋪陳另計實不爲豐豈中國之費用輕歟然
其於歐墨各洲亦如是焉

十一日晴

接總署電云已飭滬道撥銀六萬兩蒸 初九日巴黎來電言義
國本爲歐洲強國然尙不能與英俄德法比肩故不能獨立一幟
自守局外之分近年與德奧聯盟增兵購械既費巨資仍無益於
民生國計義國因欲背德奧之盟然亦不願附於俄法如得英國
保其自守局外則決與德奧解盟云 因按此法人之謀欲解德
奧義三國聯盟之局也義之強雖遜四大國然德奧合之則可以

敵俄法義不與合則德能敵法奧必不能敵俄俄法合兵則德奧難敵矣德奧義三國知彼知己故聯盟久而不渝惟義國近年以國用不足籌費甚艱雖心尙堅而力實絀正當進退維谷之際苟得一策能不聯盟而可不削弱自然樂從則惟有自處局外而得英人之保此策也義或求之英或允之則德奧勢衰矣故以爲法人之策也

十二日晴

美國水師部人員講求兵艦精益求精以近來各國礮廠所造槍彈猛銳無前雖有鋼甲亦難抵禦惟有制成一宗兵艦可以隨意出水入水無事則浮於水面遇敵則沈水伏行潛攻敵艦近已思

得兩式由水師部撥款製造云 因按可沈可浮之船西班牙曾爲之法國又爲之似法國之制尤精也然僅欲安置水雷以備守口之用故其式甚小取其便於進退浮沈若用以出洋遠適異國或相戰於大洋海面斷不能壓巨浪而不失常也今美之制之也其仿水雷之式歟抑仿鐵甲巨艦之式歟如仿鐵艦之巨固足以鏖戰重洋然出水入水又未必能靈使二者果能兼乎

十三日晴

謁外部 十一日巴黎來電言俄君親降諭旨催趨西北里亞鐵路工程又言俄國向有保護勃爾加釐亞國之權介俄土之間小國近來勃國不遵俄約束交涉之事一切自主俄以保護爲各國

會議於伯林時所准茲特備照會分致各國政府言俄國斷不肯
廢棄保護勃國之權而勃國肯之此事有礙歐洲昇平之局請予
公斷云 因於是見俄之心也營西北里亞鐵路則志在亞洲爭
保護勃國之權則志在歐洲究之歐洲之利不易爭也前此俄土
之戰俄軍已薄土耳其都城唾手可得英人護之終不得志且佔
巴馬爾之地欲窺印度終不敢與英決裂前事可知然則俄人豈
勤而無所哉其所欲逞志者從可知矣

十四日

昨至美外部處謁見者計有德義各國六公使外廳談次聞英國
新造一至大商船貨物載滿計重一萬九千噸船舵以整鋼一塊

日

記

卷十四

二十六

鑿成以期堅固惟英船廠無此種壓鋼巨器乃由德國克虜伯廠代造又言英國泊斯默得船廠造至巨鐵艦僅需兩年八箇月法國船廠則需七年云 因營涉大西洋所坐之船計七千噸據船主言此船壓浪尙不如一萬噸者之穩也今增至一萬九千噸自又穩矣然非至大之船廠機器不能造船廠之大實推英國爲首鋼廠之大應以德國爲最造船鍊鋼非由機器必不能日漸擴充蓋人力有限而機器之力無限也

十五日晴大風

美國新創博物院於山場上年共總辦曾招往遊覽以事冗未赴今年又函請往遂乘車赴約行五里許到院宅以石砌成不甚高

敞以其因山勢爲周陞以棲豢鳥獸不專於院中故也入院門見一鳥如鵲僅一足獨立甚穩鸚鵡兩種綠翅紅頸脣白紫其色之鮮畫工不及野牛與尋常牛同惟脊上有峰如駝獅與法日所見形同惟軀幹甚巨如牛猴種甚多小者僅五寸許頭如鴨卵目灼灼視人似有知識鱷魚大者一尾長八九尺平臥碎石上小者長一二尺游泳水中形如蜥蜴惟蜥蜴之皮光而澤此則有刺如疥癩耳聞其善噬雖獅虎不能敵院外各廠狐狸狝狝豪豬豺狼虎豹象熊鹿鳴梟孔雀鶴鸛分棲狼形全是犬惟尾最巨鹿如牛角之長者五六尺新脫角者頂上茸如茄皆往來於草地巨象二共一院豪豬披毛如骨簪作白黑紋虎毛作黑斑爲一字紋豹斑爲

星紋熊所棲之地另依石崖鑿壁爲之穴如巨室外圍以鐵欄有白黑二種其形如犬最巨者幾如牛鳴鳥面如貓惟其口仍蒼耳孔雀之雌者尾爲花翎有時展其尾則圓如輪其翎滿輪層疊相間謂之開屏歸而記之

十六日晴

博物院總辦來見言天氣漸煖獅子畏熱將徙赴山村避暑矣又言英國阿母司脫郎礮廠近造大礮至一百十噸可放重一千八百磅之彈有大鐵艦三艘均安此礮快礮兩種一名哈徹司一名拏而飛容三磅六磅之彈每分時可出三十彈今又成快礮一種重四千一百觔彈重四十五磅每分時能出十二彈兵艦有此礮

三尊則可碎水雷船近又造成快礮一種彈重百磅用無煙火藥
每一分鐘可出七彈最準其礮架均用水力機器運動升降旋轉
悉隨人意以電氣施放只需一人而已 因查英之阿母司脫耶
廠與德之克虜伯齊名惟鍊鋼不及焉又聞克虜伯廠已造重二
百噸之礮而未成如其能成則仿克龍斯達的礮臺設以此礮守
以重兵施放以諸習之人鐵艦雖堅無所用之蓋一百二十四噸
之礮已遠三十六里二百噸者必及遠五十里可以從容而制敵
也雖然其費甚巨籌之殊不易也

十七日晴

英海部大臣募造魚雷艇者以每一時能行一百八十里爲度且

長不得逾十六丈重不得逾二百噸以期進退靈捷云 因查英
於水師極爲認真他國兵船皆以水手充兵丁英國不然近年德
奧義諸國均留心於水雷以三雷船即可破一鐵艦權其價值多
寡相懸故多制鐵艦不若多製雷船之合算也美國創造可沈可
浮之兵船卽此意也

十八日晴

德國以俄法二國整頓武備增添水陸軍額實逼處此不可不防
擬添陸軍六萬人此項兵費商之議院又以官辦之鐵路入款無
多擬於煙葉重稅照舊稅加征百之三十五云 因按泰西各強
國蓋無一日而忘危者矧德之介於兩大耶其民皆習戰陣其廠

自制軍械兵費雖巨而金銀尙無滯厄所以能持久者此耳加征煙葉稅百之三十五蓋向之征一百圓者今征一百三十五圓所加雖驟而煙葉非民生必需之物尙不病民其中固有深意存焉十九日晴

未刻江海關來電滙到經費外部葛禮生訂見因偕繙譯往見外部言蓋力所定之例太苛擬商戶部通融辦理以期兩國和好因答曰本署照會已屢言領照註冊照相三者均屬違約必不可行外部言照會已見但可通融辦理領照之事亦不能廢因曰如此兩歧不足爲守約也外部曰此事由議院所議總統所定外部不能擅廢仍當聽議院主張耳又問公使田貝如非中國所喜將另

派人因曰請函查之不敢質言餘皆寒暄語

二十日晴

謁梅律師考美駐各國公使每員每年俸薪駐英俄德法墨各一萬七千五百圓中國日本奧義日巴西各一萬二千圓土耳其智利阿鎮丹可俞祕魯各一萬圓巴拉圭檀香山比和瑞典那威丹馬威內薩各七千五百圓朝鮮兼總領事七千五百圓玻利斐亞厄瓜多各五千圓夸的馬拉岡都拉二國共一萬圓瑞士五千圓泥格拉哥司答力戛利耳瓦多耳三國共一萬圓希臘羅馬尼亞蘇佛三國共六千五百圓以上均係二等公使波斯葡萄牙暹羅海代各五千圓駐海代公使并兼辦三德明哥事理白利公使兼

總領事四千圓以上爲三等公使美駐各國參贊每員每年俸薪
中國英俄法德日本二等參贊各二千六百二十五圓英法德三
等參贊各二千圓中國日本須諳所駐之國語言文字奧義日土
巴西墨西哥三等參贊各一千八百圓智利祕魯威內薩朝鮮各
一千五百圓美駐各國繙譯俸薪每員每年中國土耳其各五千
圓日本波斯兼總領事朝鮮兼總領事一千圓暹羅五百圓日國
寫字人一千二百圓

二十一日 小雨仍霖天氣驟熱

上議紳富施士來見又考美駐各國領事每員每年俸薪駐倫敦
巴黎利華埠夏灣拿巴西四國各六千圓駐上海香港格耳葛打

各五千圓駐美爾巴尼四千五百圓駐伯林檀香山曼拉曼滿得厘耳英屬加拿大墨西哥巴拿馬各四千圓以上爲一等駐黑利法維也納各三千五百圓駐廈門廣東鎮江福州漢口天津法國之哈華埠祕魯之嘉里約埠各三千五百圓以上爲二等駐中國之甯波薩摩島之受比駐君司但丁厄瓜多法蘭福亞得劃羅馬彼德堡奧之潑拉記比之安都智利之佛爾巴萊蘇野羅貴之滿脫佛都法國之巴地刻司德國之拜名英屬之字耳發布拉福地茂拉荷萊士哥更士頓滿旗士打星加坡日本之長崎大阪黑哥墨國立佛拉刻羅古巴之墨炭石瑞士之倍西爾可倫之箇龍各三千圓以上爲第三等駐尼佛拉來多二千五百圓駐阿鎮丹

之白拿阿萊士奧之釐清伯比之普羅士丹屬之聖大麥士法之
拉安與麥西臘士德之阿內白阿刻西拉卡倍布萊門布龍士會
氣母尼得萊騰黑巴麥引司希臘之阿神士英屬之白明夏騰地
釐甫拿丁黑西非奪吞士太域多利亨特士非墨之巴剎地拿日
之新勿過聖底哥地口巴瑞士之散格利士屬之司米拉各二千
五百圓以上爲第四等駐炭階奧之脫利士得巴西之白拿白哥
可倫之白藍口拉哥司答力曼之聖嘉士法之利母士散愛丁德
之哥羅克列法大西多釐希紐萊伯司脫曼松尼白麥地潑英屬
之卡地甫氣達哥刻特部林騰弗林黑米頓利次那沙巴羅士巴
司旦釐聖都麥士聖嘉司希布羅雪梨都龍士閩都拉之地格西

格伯義之伯拉馬馬達憂司憂之太麥推甫墨之阿客潑甫毗特
 拉士尼癩拉士和之羅拉達尼格拉之慢拿記聖舊地那俄之亞
 地利刺耳瓦多之聖刺耳伐多日屬之伯萊哥小呂宋聖舊恩刺
 吉拉癩藍瑞士之好琴石力氣土屬之皮勒旗勒刺萊威內薩之
 麥拉開婆各二千圓以上第五等駐巴西之白西巴拉散多士比
 之利旗佛肥士卡羅林島之巴南丹之哥內海涇法屬哥內格地
 羅麥丁尼口尼士德之布萊士老記耳慢西母門尼氣英屬之阿
 姆黑司波安的吉亞刻蘭白培大司白墨達布力士多布落刻佛
 蓋潑當壳底可昔耶嘉羅地當刻力頓福愛釐哥特力氣吉字拉
 耳打蓋甫庚司頓崙頓麥打馬力士白紐開士得爾安丁口倍皮

多巴火巴利尼巴司旦萊潑萊司可沙達頓聖海崙拿散嘉散司
底分士司脫萊福三江華萊西伯溫沙溫尼倍華司多野毛市義
之開士脫來美刻炭尼勿老崙司吉拿利亨美新拿密藍內白耳
士墨之麥太馬拉茂力大拿蓋爾士推畢哥和之鳴姆士打大日
牌西龍尼卡地士卡滕內司滕尼麥拉曼瑞士之琴尼佛各一千
五百圓以上第六等駐比之琴脫巴西之拉亞稱藍地大沙法屬
之阿耳及士南地司阿非力加格益埠之商董德之司脫丁英屬
之孟買格士白生西拉釐安脫刻島溫沙義之文尼士各一千圓
以上第七等

二十二日 小雨仍霽

美駐各國公使及隨使人員因詳考而志之其公使之俸不同者以所駐之國事之繁簡不同也至多者按年一萬二千圓至少者四千圓且有一使而兼兩國三國者其俸薪亦不多蓋事簡也參贊分爲二三等至多者二千六百餘圓少者一千五百圓繙譯一途所設不多者以歐墨兩洲多同文之國公使自諳其語言文字可無須也惟亞洲各國有之以語言文字不同也多者僅兩國少者至每年五百圓繁簡殊也領事分爲七等由六千圓遞減至一千圓不但駐此國者與駐彼國之俸不同卽同駐一國而俸之多少亦不同如駐上海香港之領事則五千圓駐福州廈門廣東鎮江漢口天津者則三千五百圓駐甯波者則三千圓蓋量地而用

人卽量材而受祿祿之豐殺視其缺之繁簡而分其不強同者正所以求其當也

二十三日 小雨 天煖夜雨

檀香山國內亂之時日本曾有兵艦一艘巡泊該口聲言美國如保護檀香山他日或薄待日本流寓該島之民日本必以力拒近日日本又續到兵艦一艘方美國未允保護檀島時日本駐檀之員與該島政府商爲保護且昌言該島儻不歸美國保護日本政府願任保護之權云 因嘗聞美國官紳言保護之事非同兒戲以美國之密邇檀島尙須審慎以出者恐力有不逮則得而復失將貽笑於人也且現在之欲得檀島者爲英國日本內度兵力與

英孰強外度英人肯拱手而讓乎況美曾以兵艦攻日本矣日本不能自保何以忽有餘力以保護人耶誠莫解矣

二十四日雨

梅律師來商議照會外部之業請將以前工黨焚殺華工之案一
一查明年月增入彙內 查美國礮廠國家設者二處一水師大
礮廠在華盛頓城水師廠內一華打威利益大礮廠在紐約省威
司特的來商家設者七處一威司特杯煙特風地利大礮廠在紐
約城沽路司丙冷一修甫波士頓大礮廠在馬薩朱昔省修甫波
士頓一壳蓋司阿特南司公司小礮廠在華盛頓城邊施溫尼阿
街一的力司阿特南司公司小礮廠在華盛頓城十四街一威林

加南布晏順司小礮廠在邊省費城一布拉城威特尼公司小礮
廠在幹置地葛省哈富城一格林礮公司小礮廠在幹省哈富城
槍廠國家設者一處一司丙令斐特螺紋槍並壳蓋司螺紋槍在
華盛頓城軍械廠禦備商家五處一沽路特槍廠在幹省哈富城
一溫者士打連响槍廠在幹省紐希溫城一李槍公司在紐約城
一布拉地威特尼槍公司在幹省哈富城一林明敦槍公司在紐
約省衣利安船廠均商家所設共二十九處一林加南布晏順士
船廠公司在邊省費城一天仁埃仁華克士船廠在嘉省珊藩昔
士哥一巴甫仁華克士船廠在緬省巴甫地方一哥崙比埃仁華
克士晏杜禮篤船廠公司在馬理蘭省波地摩城一高離士煙占

尼阿令船廠公司在紐約省布祿連城一埃阿華埃仁華克士船廠在埃阿華省都卜克一山廟路摩兒晏順士船廠公司在紐遮西省衣禮沙拔市砵一西地杯煙特華克士船廠在馬省修甫波士頓城一阿蘭的埃仁華克士船廠在馬省波士頓一黎司頓埃仁晏洛甘摩弟甫華克士船廠在嘉省珊藩昔士哥一紐砵紐司涉卑丁晏杜黎篤船廠公司在華前尼阿省紐砵紐司埠一馬理蘭士弟路船廠公司在馬理蘭省司巴羅士杯煙特一地拉威兒里華埃仁涉卑丁船廠在邊省者士打一沽拉布埃仁華克士船廠在阿埃阿省基利夫倫城一布西晏尊士船廠公司在地拉威兒省威明頓城一者衣治大洛煙賤船廠公司在紐遮西省甘定

一尼非晏黎威船廠在邊省費城一地代杜禮篤船廠公司在米
施根省地代埠一基利夫倫涉卑丁船廠公司在阿埃阿省基利
夫倫城一天仁杜禮篤船廠公司在紐約省巴法羅城一煙衣甫
巴麻船廠公司在紐約城一理治門洛甘摩地甫華克士船廠在
華前尼阿省理治門城一修甫華克浮煙地理晏馬先船廠公司
在邊省費城一渣里士列他晏順士船廠在馬理蘭省波地摩城
一哈蘭晏賀令司華富船廠公司在地拉威兒省威明頓城一渣
里士黑路門涉晏煙踐卑丁船廠公司在邊省費城一舍路杜禮
篤晏涉卑丁船廠公司在華盛頓省舍路埠一標接爽煙賤尼令
華克士船廠在華盛頓省砵當勝埠一洛活滿紐法朱令船廠公

日

記

卷十四

司在馬省衣士特波士頓城

二十五日晴

美國船廠槍礮廠分計若干設於何地已詳之矣因論美國家上年製造鐵艦巨礮不由國廠而由商廠言商廠之價較廉也地球各國槍礮廠以德之克虜伯規模爲最大工作至六萬人富可敵國英國阿姆司脫郎次之皆商廠也凡事之經官辦者弊多而商辦者弊少西洋各國亦然顧有商廠以相形容則官廠尙不至過於壟斷亦不敢十分舞弊若無商辦而僅由官辦雖有廉明之大員稽查亦必不能無弊也

二十六日 小雨

法國與阿洲之達河米國構兵屢爲所敗法廷以該國均係黑人
安有智謀必有歐洲人民爲之謀畫迨平定後查得實有德國商
人爲購軍火已有實據遂逐出境本月二十二日巴黎來電言法
廷以德人一名在魯安埠偵探地方官拘之監禁該德人於監中
與德國駐法領事及公使爲之仲雪而法之書信局不卽爲寄及
至法員查明該德人實係無辜釋放後始行送到茲德公使已向
法廷詰問云 因按此二事之虛實難明而二國之芥蒂可見如
二事全實則爲德之讎法如二事全虛則爲法之讎德且私售軍
火暗行偵探各大國皆有之法之於德何獨不然但未遽敗漏耳
若法爲弱國則必不敢嚴辦若德係弱國則必不敢徑行蓋以弱

當強則弱者之理不能直伸而強者之勢且可反噬今皆係強國則無可設施不過敷衍息事而已

二十七日晴

赴大將軍史戈飛茶會見德國俄國朝鮮及墨洲各公使下議紳司斌介聞美總統近日所派出使各國諸員名約士底駐法國倫勇駐德國力斯萊駐丹國拜亞駐英國爲頭等公使布羅海駐瑞士脫力潑駐奧國阿拉克散大駐羅馬尼亞希臘蘇佛諸國愛溫駐比國泰拉駐日國脫利耳駐土耳其國已交議院議准云 因查美國更換總統之年凡欲得總統者必有助之之人爲之招徠保舉事成則以各缺爲酬勞故總統更換各處之缺均多更換也

使英之拜亞卽基利芬前爲總統之外部今爲頭等公使然則德俄法義奧日諸邦彼此均將改爲頭等矣又聞新派駐奧之領事名澤德者爲猶太人奧國不願接待謂從前美所派駐之公使其妻爲猶太人奧不接待有舊案存美廷將改派矣

二十八日陰子刻以後雨

自上年以來墨洲諸小國紛紜多故檀香山爲美所佔巴西阿鎮丹民變海代國因監禁美商美國調兵艦以脅賠償祕魯國人焚劫美使館美廷業已詰責吉白海島國英已踞之威內薩國拘逐義人三德明哥國以關稅由美國權收而民變尼格拉國與哥司答立憂國爭界失和可崙國旣侮英使又值歲饑其勢岌岌憂拉

曼國與閩都拉國業已決裂交兵矣 因查亞墨利加一洲四百年前榛榛狉狉既無史乘莫由知其治亂若何自可崙比渡大西洋而來風氣日開遂不能閉關自守始爲西班牙屬國繼乃自主今又不能自主英法德美各國或爲保護或令入貢或佔其海口削其版圖連雞之勢不能俱飛團沙之情不能合縱數十年內可決偕亡計其開闢至今僅四百年彈指滄桑殊可慨也亦可畏也二十九日晴

外部葛禮山請赴衙門商議公事 因偕繙譯往晤葛禮山言二十七日所來照會已領悉惟屬勿拘拿華人一節此應俟總察院斷定此例之當行否如以爲不當行自然不能拘拿 因答曰美國務

民本惡華人今政府創爲拘拿自然益無忌憚但恐釀成焚殺之禍如以前洛士丙冷諸案總統新卽位貴大臣新到任似不願見此宗變故故請勿拘拿以冀息事甯人外部曰將來行例必當如貴大臣意格外從寬且總統頗不以此例爲然諒總察院斷無不駁似可放心因曰向來總察院散院之期正值行例之日所請稍緩十餘日以俟判斷之說自然必確外部曰已與商矣但尙有一事相詢究竟田貝在中國聲名如何因曰聞諸傳言有以爲是者亦有以爲不是者已發書詢實在情形矣外部點首曰不日當有覆文遂散

三月初一日 辰初大雨雨止而晴

日斯巴尼亞聞三得明哥國稅歸美國代收又以古巴一島相距甚近恐美國之吞并卽調兵艦赴古巴保護嗣據美國駐日公使照會日廷言美無覬覦古巴之心乃調回所撥兵艦云 因於光緒十八年春赴古巴查古巴一島與美鄰較檀香山尤近日國前四百年所闢墨洲之地以後或由地主自主或爲他國所踞其尙存者惟古巴耳而古巴之民常苦日國苛斂故前此揭竿謀逐日員而自主終以不勝仍降於日日廷恃爲外府而終不恤其民之思亂久矣如古巴所鄰者爲歐洲強國久已顧而之他特美國尙率創國舊章不願佔他國土地故剝果猶存耳然日之國勢漸衰而古巴之積憤已久如不整頓終必如墨洲諸地轉屬他人焉

初二日晴

二月二十一日檀香山來電言日本國聞檀島內亂派兵艦二艘來檀駐泊適有日本人之犯重罪逮繫者逃赴日本兵艦隨由檀政府照會日本駐檀公使請交逃犯日本公使覆以萬國公法內載各國兵艦無論下旋何處均照本國土地例視該犯既逃回兵艦日檀兩國無互交逃犯之約未便交回當俟本國政府明文辦理又聞美新總統不願保護檀島已於二月十二日派下議員外交處紳布郎赴檀察看情形二十九日來電言留心訪查該島民情實願自主因將美國旗號收回并撤水師兵弁回船仍由該島官民自治亦不准他國保護云 因按美國處置古巴檀香山事

頗有合於仁義之道日本所爲則未免霸氣也美國力可爲而不爲日本力不可爲而強爲兩國海軍強弱昭然益以越國鄙遠彼己之勢不待審度然則美如保護檀島日本固難與爭美不保護檀島日本亦難獨佔也

初三日晴

英國自兼并緬甸後駐防之員察得地方大害以鴉片爲最業已嚴禁私相買賣惟向來吸食者勢難立時戒斷現已定章必須先赴衙門聲明挂號給憑方准吸食云 因嘗聞法國駐越南之兵英屬印度之民近皆沾染鴉片則其難於設禁也明矣又聞英國禁鴉片會以中國之加鴉片稅而各散則其重於利國也明矣又

查本年德國增兵之費計近千萬卽取諸菸草之稅美國呂宋煙稅每磅征銀四圓菸稅如此則鴉片可知矣美國煙膏之稅每磅征銀十二圓則視成本已三倍矣窺其用心大抵於事屬當禁而又難於禁者卽以不禁之中寓禁之之意其從吾禁也固可以裕民其不從吾禁也亦可以裕國其於緬甸鴉片一物不准其私相買賣則必權稅無疑又令吸煙者挂號領憑則權稅亦無疑可以知其用意矣

初四日晴

德人辦理朝鮮稅關者名果克來謁 巴西國征剿叛民追過烏拉乖地界甚至騷擾烏國人民至於失和其兵船之泊巴拉圭者

與地方齟齬輒開礮轟擊其都城巴拉圭國向巴西政府詰問巴西不理且另調鐵艦一艘至巴拉圭囑喝云 因於是而歎海軍之不可缺也南墨洲皆小國智利稍強其前此勝祕魯亦如邾之勝莒耳巴西不如智利而恃其兵力凌轢極小之國墨洲風氣漸囂張矣昔日本恃其兵艦以侵臺灣今亦覬覦檀島風氣如斯積漸實非一日申公巫臣與莒子言勇夫重閉蓋亦識時務者乎

初五日雨

英公使來函言已遞頭等公使國書是夜亥正見客因偕繙譯往見并陪美外部葛禮山戶部愷來爾之夫人大將軍水師部大臣各國公使惟法國公使未到 奧國步軍向分二十五隊茲因德

已增兵今於每隊增一百四十四人礮兵則增二十八隊增兵之費初年需一千萬圓以後則按年五十萬圓本月德國政府向本國商民貸銀一千三百萬圓周年納息三釐收銀照八六折願貸者溢至三倍云 因聞德主因俄增兵額商之奧義兩國亦擬增兵而義以餉絀不能增德主乃爲自增之計今奧國亦從之不得已也德之軍械取諸本國之廠其貸款籌諸本國之商雖八六折而納息甚輕且此項爲軍餉之費則仍散之本國之民國用雖費而非等漏卮也然則居今之時當擾攘之局偃武不能爲緩急亦常有惟有設廠自製軍械講信以孚民心庶利源不耗於外國耳

初六日晴

日

記

卷十四

巴馬兒事前聞俄人願與中英兩國分而立約不願三國合而立約俄人又謂中國注意巴馬兒急修邊備遂亦調兵赴巴上月二十一日印度來電言俄造鐵路直達印度一旦有事數十萬衆可呼吸而至長驅犯邊茲英亦造鐵路直達俄界以禦之又於隘要修築礮臺工程漸次告竣將來俄軍犯界進戰退守肆應裕如運糧調兵諸臻靈便此後可高枕無憂云 因於此窺強俄之用心亦於此得防俄之善策俄不願與中英合約者防中英勢合則俄受牽制也否則三國分界自應三國共商如美與英法爭祕林海界清界之舉固合三國而公議也俄造鐵路以達印邊英亦造鐵路以達俄邊調兵轉餉咄嗟可辦迎而拒之要而擊之庶不至緩

不及事也 因於光緒十年已疏陳矣

初七日 晴中夜微雨

謁外部戶部之夫人 二月二十六日倫敦來電言英國今年添造頭等鐵甲二艘二等一艘較以前之鐵艦尤速安置重六十七噸之鋼絲新式礮又造破水雷之快船六艘每一時辰行一百八十里造成後試驗合用則添造十四艘共需銀一千四百二十四萬零一百磅其頭等鐵甲每艘需銀九十七萬磅又卡達麥船廠所造之鐵艦一艘容一萬四千噸馬力一萬三千匹每一時辰行一百二十里其礮亦照以上之新式云 因按英國今年所增之兵艦共需銀一千五百餘萬磅合中國銀七千餘萬兩古之所謂

糜餉者未若是也卽今時各國之所謂糜費者亦未有如是之甚者也然其材料取諸本邦其工匠集諸本地其價值散諸本國之商廠此七千餘萬兩之銀雖出於國帑仍毫無漏卮且藉以勸百工而制造日精武備日盛敵國隱消其覬覦誠計之得者矣

初八日晴

二月初五日馬得力來電言日國前派兵艦以防美之攘奪古巴嗣知美無此意隨卽調回茲聞法國派兵至三德明哥登岸日廷驚駭擬卽調兵艦往探矣二十五日巴黎來電言法國接駐越南總督電文法兵於二月十八日已據暹羅米江中之哥恩海島暹羅不敢與爭又聞阿洲之摩洛哥國東鄰法屬之阿爾枝理地方

近法人於其邊界造鐵路以達摩洛哥云 因聞法得越南後墾地通商哥壘麥座剎根三埠房屋日增荒土日闢氣象新矣英人本垂涎暹羅徒以暹主修好於英未忍削滅茲法爲戎首英人未必肯讓暹羅危矣摩洛哥國地當阿洲要隘英德法義日五國久已覬覦莫敢先發者慮爭之者衆也今法人於毗連之地興造鐵路一日調兵奪隘猝不及防摩洛哥豈能力拒但未知英德義日四國皆肯拱手而讓否耳

初九日晴

上議紳佳黎生訂見日國水師提督亥初往見總察院各部各國公使惟英法德朝鮮未見歸時已子正矣 美國議院去年議增

淺水兵船茲已繪圖發廠照造又因水雷購自他國緩急難恃既不敷用且慮銀錢漏卮已於黑立發刻士地方創設造水雷廠以備兵艦之需且期精益求精云 因按光緒十年中法開釁粵省於美國購黎槍美廠不敢運粵僅交香港臺灣所購之槍將到時爲法國兵艦追查乃盡棄之海中則緩急難恃之證也方今邊防日亟偃武無期槍礮兵船水雷諸械購自外洋有限鎔銖去而不返漏卮之弊長此安窮譬如久病之人元氣日虧體質安能強健美國所策其有所見於斯乎

初十日 小雨

日本輪船由橫濱赴舊金山載有妓女多名日關偵知卽拘留上

岸從嚴訊辦二月二十六日馬得力來電言接小呂宋總督電文
所屬太平洋之毗琉海島近爲日本兵船所踞亟請設法增兵查
此島在小呂宋與格羅蘭島之間太平洋之北距小呂宋四百五
十米居民萬人地尙膏腴云 因查日本商船向往來上海長崎
橫濱近年至檀香山又至美國之金山漸推漸遠商務漸擴矣海
軍之力似不敵西班牙而居然佔踞其屬島此未必確或者毗琉
一島始爲西班牙所得繼而棄之如荷蘭之於澳大地亞則人棄
我取不能指爲日本之侵吞然西班牙既有權衡以兩國海軍之
強弱日本似難終踞焉

十一日晴

卯正興辰初飯飯後啟行赴紐約中正到晚飯畢卽往謁大狀師
蓋剔阿物士利亞頓商請蓋剔利亞頓於西五月八號赴華盛頓
公堂駁例以阿物士在紐約提調諸事又慮美員騷擾華民另請
狀師文阿倫專護華民如其至期有巡捕拘拿之事則由文阿倫
阻止阻之不能則向公堂保釋候審商議妥帖回車已戌初矣因
至諸狀師辦事處其街爲紐約稅關及稅庫兩衙門所在觀其工
料堅固之至自地至頂均用徑方六尺之白石砌成玻璃窗甚小
仍以鐵棍縱橫爲格水火盜賊無從損傷自非地震當可屹峙數
千年矣

十二日 大雨

卯初興辰初飯飯後偕繙譯巡捕赴會兵船已艤海畔各國公使陸續而到惟未見朝鮮使臣耳英俄兩使均乘本國兵船赴會者爲代辦墨洲各國半攜眷屬歐洲惟葡使挈其夫人午正出海總統攜后并各部長爲一舟各國公使共一舟總察院上議紳各部副員爲一舟而總察院不願到云將散院亟須清理積案故也午初設醺甚豐水師弁兵伺候一切午正醺畢展輪出口則各國兵艦星羅碁布未見起碇名爲操演實未操演也惟本舟過時則聲礮耳火藥之煙彌漫海面至兩船不相見回舟已酉正矣又至大狀師處訂定屆期提案至華盛頓總察院衙門訊駁

十三日晴

辰正附火車返署查昨日各國赴會兵船英國頭等鐵甲四艘一名壁立容九千噸馬力二萬匹每一時辰行六十四海里裝煤一千五百噸兵頭三十四名兵五百二十九名此船爲至巨至速一名柯士耶容五千六百噸馬力八千八百七十六匹每一時辰行三十七海里一名麥知辰容二千九百五十噸馬力九千二百六十二匹每一時辰行三十八海里一名拖打容一千七百七十噸馬力三千八百二十四匹每一時辰行三十四海里又半二等鐵甲一艘名白列容七百五十噸馬力一千三百零二匹以上共五艘皆亦內所成法國頭等鐵甲一艘名眞白容四千一百六十噸馬力七千八百四十六匹每一時辰行三十六海里木戰船

一艘名亞利儒士容三千六百頓馬力四千一百三十二匹戰船
一艘名下賽容八百八十頓馬力七百八十七匹以上共三艘有
前十年以外者惟頭等係新成德國頭等鐵甲名開沙柯容六千
零五十二頓馬力一萬二千六百匹每一時辰行四十海里係新
造戰船師亞拿容一千八百八十頓馬力二千七百匹每一時辰
行三十二海里以上共二艘俄國頭等鐵甲五艘一名總拿千麻
容七千七百八十一頓馬力八千二百匹每一時辰行三十四海
里一名巴茂亞華容六千頓馬力一萬一千五百匹每一時辰行
三十八海里一名衛地舟士箇容五千七百九十六頓馬力七千
匹一名貞亞糜盧容四千六百零四墩馬力四千四百七十二匹

一名連打容二千九百六十五噸馬力三千匹每一時辰行三十海里頭等戰船一艘名黃帝爾可拿事容九千四百七十六噸馬力八千四百匹以上共六艘巴西國頭等戰船名亞幾打半容四千九百五十噸馬力六千二百一疋二等鐵甲一艘名地寶北地容一千三百噸馬力二千四百匹每一時辰行三十四海里礮船一艘名太倫頓士容八百噸馬力一千二百匹以上共三艘義國兵船一名依拿容三千五百三十噸馬力七千五百匹每一時辰行三十四海里一名記柯還依波新容一千一百三十墩馬力六千四百五十六匹每一時辰行三十四海里一名當高利容二千八十八噸馬力七千六百匹每一時辰行三十八海里以上共

三艘均爲頭等鐵甲日斯巴尼亞頭等鐵甲名衣拿衣眞天容四千七百五十噸馬力一萬一千五百匹每一時辰行四十海里戰船名煙芬打依士波容一千一百五十二噸馬力一千五百匹水雷船名新呂宋容五百七十噸馬力二千六百匹每一時辰行四十海里以上共三艘和國戰船名環士排容三千四百噸馬力二千五百三十二匹計一艘拉巴拉他頭等鐵甲名新地諸璫容三千五百噸馬力一萬四千五百匹每一時辰行四十四海里又七分計一艘美國水師提督鐵甲坐船名飛拉得爾飛容四千三百二十二噸馬力八千八百十五匹每一時辰行三十八海里第一隊戰艦六艘一二等鐵甲名烏獲容四千零八十三噸馬力八千

八百六十八匹每一時辰行三十八海里一二等鐵甲名亞輪打
容三千一百八十九噸馬力三千三百四十五匹一二等鐵甲名
三夫蘭借士哥容四千零八十三噸馬力九千九百十三匹每一
時辰行三十八海里一二等鐵甲名巴的馬容四千六百噸馬力
一萬零六十四匹每一時辰行四十海里零二分一三等戰船名
班林頓容一千七百噸馬力三千四百三十六匹每一時辰行三
十五海里一練兵船名板可壺容八百三十六噸馬力一千三百
匹一二等鐵甲名希卡果容四千五百五十四噸馬力五千八十
四匹一三等兵船名若檀容一千七百噸馬力三千三百九十二
匹每一時辰行三十二海里一二等鐵甲名渣士頓容四千零四

十頓馬力六千六百六十六匹每一時辰行三十六海里又二分
一炸藥礮船名威數威容九百三十頓馬力四千三百六十六匹
每一時辰行四十二海里一三等兵船名干戈容一千七百頓馬
力三千四百零四匹每一時辰行三十七海里一防海兵船名萬
爾安容三千九百九十頓馬力四百二十六匹一水雷船一艘名
苦臣入水三尺五寸容一百三十二頓馬力一千七百二十匹每
一時辰行四十五海里兵頭三名兵役二十名一磅礮三尊水雷
三箇又可倫比初到墨洲所乘之舊式帆船大小三艘一美總統
與各部所坐坐船一船名打獵分容一千四百八十五頓馬力二
千一百十八匹一各國公使所坐兵船一艘名壁立容三百五十

頓馬力二千一百七十匹一議紳坐船一艘名萬某係遊船非兵船以上兵船凡一時辰行不過三十海里者均不記所行里數英國船爲最巨式且新美國船新者亦多而巨者少當讓英國首屈一指矣

十四日 小雨

上月伯林來電義國庫欸支絀無可設法已向德國銀行貸銀六千萬佛郎又馬得力來電日國歷年虧空至今共短七千萬佛郎近竭力整頓以加稅爲開源以齎用爲節流現已由節齎項下彌補三千萬佛郎尙不敷四千萬卽由議院議定於加稅項下所收彌補云 因按義日兩國爲補不足之計日之所籌似勝於義義

爲借貸之舉本係剝肉醫瘡且又貸諸他國之商殊失計矣日以
畜用加稅爲計畜用則量入爲出加稅則量出爲入歐洲各國恒
如是且入口之稅居多尙不得爲病民也

十五日晴

梅律司送到照會外部似欠切實卽爲更定 聞東三省鐵路已
造至灤州三四月間關內可望竣工此後卽可設局關外逐段興
造云 因於輪船鐵路二事考究二十年決爲富強之本自出使
後頻於美之官紳延訪其老成練達者皆言美國富強之驟實由
鐵路之多且有比較各國鐵路之多寡有無以知其國之強弱貧
富者若美若英若德若法若俄所謂頭等之國者其鐵路之多亦

居頭等若奧若義若日二等之國向之稱富強者今漸不及究其鐵路實居二等若和蘭若比利時其鐵路又減其國勢亦殊至於印度波斯阿富汗埃及賽爾斐亞羅馬尼亞諸國或鐵路由他國代設或竟無鐵路其國勢更昭然共知蓋各國之強弱貧富不可掩者也鐵路輪船之多寡有無尤不可掩者也亦如中國孔子之道得全者昌失全者亡捷於影響耳因聞鐵路日興欣然而喜因憶其言而志之

十六日 小雨已後霽

德國議院擬大興鐵路添造新路七條并展造舊路六條務使火車四通八達無處不到以利用兵而使商旅計鐵軌車頭坐車貨

車各費需銀一千二百四萬一千餘圓又德國各處駐防之兵以冬春多雪操練爲難因改用雪鞋操兵行動較爲便捷云 因按德爲布魯士盟邦之一以前無所表見三十年內日臻富強度其英君賢相凡所規畫必有大過人者因駐美三年與德公使時相見虛心詢之乃益信強國之勢在練兵制械足國之道在通商惠工而輪船鐵路則爲二者之樞紐蓋無事之時運載利便有事之時調動神速地球各大國其皇皇營謀如不及者非虛僞也凡以富強之謀固未有勝於此者耳 照會外部爲駁領照例也

十七日 晨小雨仍霽

卯正准北洋大臣電開總署電本處會照會田使請電外部暫緩

舉行新例俟楊使到後再商田覆已於初七電外部刻接電覆謂此新例非必立刻照行須俟總按察司核與本國例相符方能照辦看此語意當可從緩云希酌辦并傳諭金山工商董事云鴻籙准此當卽轉電金山矣 美國水師人員留心戰事謂水雷爲破鐵艦之利器而不易奏效者因敵船能見其來而防之也欲求敵船不覺莫如水底潛行已思得一式由議院撥費二十萬圓試造合容一百二十五噸其駛行以電氣汽機均可又俄國駐美公使以美國講求水師年精一年請於本國派水師人員藉資考鏡前日已派兵官名麥佛哥到美 因查地球五大國若英德法三國接壤比鄰陽相好而陰相尤武備自不能弛如俄美二國一則環

北冰海一則處北墨洲盡地足守比鄰又無強國似可不以武備爲急且俄尙有拓地之心而美向守開國舊章不准覬覦他人土地似可以休兵息民者而講求水陸兩軍皇皇如不及焉何也中
公巫臣曰勇夫重閉古語云虎豹在山藜藿不採當今之世畏戰者戰事必多以狎而侮之者衆也能戰者戰事必少以畏而敬之者多也然則欲求休兵莫如練兵欲求息民莫如勞民此機緘也
美國之所經營者卽此意也

十八日晴

上年准北洋大臣咨開天津洋報向來由水綫公司發寄泰西者每字價洋兩圓四角四分今由俄發去僅洋一圓四角四分每字

可省洋一圓則官綫每年大可多得進款今將在滬與包辦處所
訂合同詳譯並通知各局價目公電及知照各士商詳細擬定每
字以洋銀計價由津八角八分由估八角山蘆山關由錦由旅由
邊均七角八分由營由金山奉均七角六分由威八角八分以上
係至俄國由津一圓四角四分由沽一圓四角由蘆山關由錦由
旅山邊均一圓三角八分由營由金山奉均一圓三角六分由威
一圓四角八分以上係至歐洲由津一圓八角四分由沽一圓八
角由蘆山關由錦由旅山邊均一圓七角八分由威一圓八角八
分以上係至美國 因查美國電至天津每字價銀二圓四角四
分外洋不以四碼爲一字而中國向用四碼外洋遂作爲兩字之

價是每字四圓八角八分矣因以勻碼之法勻四爲三每字亦需銀三圓二角五分二釐準以美國近年銀價卽合中國四圓有餘誠不可不設法但其章程僅有由津至美之電而無由美至津之電豈未與美電公司訂定歟本月初三日倫敦來電謂中國與俄國所接之電已經通行其價雖減而往往遲至數日是以發電者均不由此綫云云豈發電之法未盡善歟抑他族妒之歟又查問美國電報局電至中國何以不照此價尋據復稱海綫達中國者三路一曰衣士頓一曰印度一曰那甫頓那甫頓卽由歐洲西比里亞之俄境三路電費均同一律惟由華盛頓電澳門每字需銀二圓一角二分其電臺灣每字一圓九角九分微不同耳

此信存檔

十九日 晴午後大雨

歐墨兩洲通商水路由大西洋徑一萬里僅需七日出產日盛現有輪船不敷運載近德國和國各新創一輪船公司專爲紐約來往云 因聞美商欲於大西洋分歐洲各國輪船之利不令獨攬利權正籌集股創設輪船公司而德和兩國已先爲之所謂明者所見略同歟又查中國土產苦於出口稅重不能與各國爭利而又無出海商船以致運載之利又爲異國所專卽近鄰如日本者兩國通商人民貨物往來亦僅由日本之船而無中國之船日本自謂與中國通商所獲利者甚鉅此共聞共見也

二十日晴

二月初一日倫敦來電言英皇偕伯爵羅司伯赴義國發老力士城會德義兩國之外部長初七日義國發老力士城來電言英皇已到義主派其姪往迎并送至巴爾媚城三月初六日羅馬來電言義主成婚二十五年之期各友邦均慶賀德主偕后率宗室親臨行禮到時義主偕后親待於車廡相迎至格黎那宮開醺教王則派相臣馬星尼英世子是日亦到十四日羅馬來電言德主偕后到義數日義主與后每日偕往各處遊覽極形親洽德主偕后擬明日返國云 因按周禮所載觀遇朝宗之禮於泰西見之蓋顯以示友邦之和好而隱以消敵國之覬覦也百年之間英人於拿破侖之攻西班牙俄軍之攻土耳其皆力保全之近年於德奧

義之聯盟則隱願其合於俄法之聯盟則不欲其成而於德之欲
開釁於法則婉阻之其用心可知矣今則赴義而會德義兩國之
外部并親臨義主之吉禮度其深心蓋慮德義之交不固而招外
侮之來故爲聯之以保歐洲昇平之局也

二十一日晴

接外部照覆言必保護華人 上月馬得力來電言日國治古巴
與波都歷古兩島向不得法故常民變茲日政府擬改其苛法准
兩島自設議院以通上下之情而免隔閡又英之埃爾蘭亦苦英
人苛待民心屢變茲又不靖管理該島人員現出示禁運軍火入
口以防之云 因查泰西各屬國皆苦於重斂美之於英卽前鑒

也顧其國家雖重斂而尙能維持其商務民之不至重困者此也
日之屬島僅古巴小呂宋二處而民均不靖英之屬地徧天下而
埃爾蘭近在肘腋之間民亦不靖乃所以治之之道一用柔而一
用剛其不同者何也則國勢不同也日之兵力弱而屬地遠鞭長
莫及威力不足以懾之故利用柔英之兵力強而埃島近緩急可
恃威力足以懾之故利用剛地球各國其處置本國之民與與他
國交涉均此意耳

二十二日晴

謁梅律師聞外部戶部分電各省不准拘拿華人有阿利干省總
督覆電不以爲是痛詆總統及兩部又聞美國於一千八百九十

年六月 卽中歷光緒十六年五月所添頭等鐵甲三艘由費城喀拉姆撥船廠承造者今已成功試水命名陳拿美總統各部上下議紳水師人員士民約萬餘人臨觀其鐵甲厚處約八寸長三十四丈八尺至闊處六丈九尺入水二丈四尺容一萬二百噸裝煤一千八百噸將架十三寸口徑大礮四尊八寸口徑八尊六寸口徑四尊速放礮二十八尊水雷六管價三百零二萬圓 因查美國於本月初與厄瓜多國訂約請以厄國之格來巴哥海島作爲美兵船蓄煤添煤之地厄國總統已允交議院議矣美之水師向無聞焉數年以來籌造兵艦礮雷不遺餘力日盛月新其所以易措手者則以船廠礮廠林立各邦鋼鐵金銀豫儲礦庫咄嗟可致

無廣採購鄰封也詩曰迨天之未陰雨徹彼桑土綢繆牖戶美國有焉

二十三日晴

美國管理內地稅員造成月冊已報戶部計自上年西歷七月至本年三月共九箇月收國內稅銀一萬二千零五十一萬零零十六圓九角五分其所收之稅大抵煙酒兩項爲多其次則假牛油此外甚少云 因於美國煙酒之稅之所以重者蓋屢言之不復瀆矣且非僅美國爲然蓋中國以外固無不然也因嘗取其煙權之其大枝者每十枝重一兩三錢中等之價需銀一兩其小枝者每十枝重三錢二分中等之價需銀二錢隨使員中有嗜之者大

枝日需五枝小枝日需二十枝蓋中人十口之家日用之費矣香
冰酒之沽於市者每瓶需銀四五圓其價之費因其稅重故也泰
西各國於煙酒玩器各項之無益於民及女閭博局鴉片之有害
於民者悉以重稅苦之蓋有深意存焉卽其於作奸犯科罪不至
死者亦以罰鍰科之而不用鞭撻笞杖卽此意也 因又聞和國判
斷錢債之案有足稱者凡債主之控欠戶也官司卽提欠戶查其
所欠屬實卽予監追其監追之法則但監而無追惟欠戶之日食
須由債主供給欠欸一日一清則欠戶不能出監債主之供給日
食亦不能缺但缺三日則欠戶鳴於官官卽釋之矣蓋錢債一事
固有有意不願償者亦有無力不能償者其不願償者必有身家

決不願久於監禁以廢時失業其不能償者日食不給今得監禁而轉免飢寒自安之若素矣且欠戶之身家能償與否債主盡知官司如此辦理債主於必不能償者亦決不控於官蓋原璧已不能歸而供給又將虛糜也泰西好用機巧此皆無形之機巧歟

二十四日晴

拜發保獎隨使人員一摺又片三 希卡果狀師昨日來電以華優二百餘人赴會美國稅關阻其登岸請照會外部今日投刺謁見因却之 德國陸軍一律改用無煙火藥以其施放之後不瘀槍管臨陣之時無煙障目故美國上年製造甚多當時試驗實係合用近日試之則又不然蓋幾不能送彈出管矣 因查火藥之

配合硝取其速然磺取其炸力而磺之煙最重欲其無煙則必以有炸力而無煙者代之樟腦是也顧樟腦之性辛香善竄與麝香同凡香竄之物皆香氣團結而成氣散盡則質亦盡故蓄麝香樟腦者必用毫不洩氣之器防其散也今美國火藥既以樟腦代硫磺則當防其氣之走洩今仍以蓄火藥之法安放及其累月經年則樟腦已化氣走散宜其無用也事之初創者本難盡善精益求精自然釋回增美矣

二十五日晴

駁例狀師利亞頓來見言總察院於今日會審西刻大狀師轟剔伊物士阿士頓來見言已與總察院駁論且看總察院之意如何

又言美國每屆舉總統之年欲舉者卽以禁華人爲總統之券上年又值總統求留外部布連又與爭奪故其禁例愈嚴而不料其皆不得也徒貽笑柄云 二十二日伯林來電言德主擬添兵額交議院公議議院不准德主遂令散院通諭國人另行公舉議紳又聞德相宣言於議院言奧爾賽司鹿林兩省本爲德國土地今既收回將來有爭之者無論如何勞師糜餉決不以尺寸與人云 因查奧爾賽司鹿林兩地乃二十年前德勝法時法割以與德者也歐洲風氣大抵不敢示弱所謂戰勝於無形也德法各國土地犬牙相錯其界尺寸不可踰越其勢尺寸不敢讓人其立國以練兵爲急其籌餉以通商爲先且必有至鉅之餉項儲積於平時

不待張羅於臨事焉若土耳其若丹馬諸國向之所稱爲大國者數十年來其土地爲各國割裂過半遂至一蹶不振日就衰弱亦猶人之肢體摧殘廢痿斷未有能久存者也

二十六日晴

接金山電言駁例事卽覆電 二十二日倫敦來電言俄國之保
闡一省介德俄奧三國之間向爲川武之地其中猶太籍者一百
五十萬人俄之苛待猶太人無所不至猶太人之恨俄已深現時
俄與德奧外修好而內積怨觀釁而動果有戰事猶太人必爲內
應甚且倒戈俄政府亦深知而防之二月間出示通諭所有保闡
省猶太人之散處各村者一律遷入城鎮俾官府得以約束云云

其實欲以轉徙不安者迫之出境此項猶太人又必來美美國宜設法禁阻云 因按古之固邊防者嘗拒異國之民然拒之於初來之時非逐之於安業之後也虞書曰安民則惠曾子曰有人有土聖賢之訓乃不可以例今之時嘗考亞墨一洲歐人踞之而逐其土著今則歐人日多而土著日窘馴至無可棲身避入山僻數百年後種類絕矣中國黔滇閩粵邊地苗獍猺獠之類異種甚多迥古以來不聞驅逐然則我 國之寬大誠莫與京矣

二十七日晴

接金山華商電云總署有無來電覆以未接來電 昨日馬得力來電言西班牙國庫欸入不敷出已經多年昨日戶部大臣布置

來年經費送交議院查核量入爲出仍餘五萬二千餘圓此日國
近年所未見議紳喜形於色查其中開源節流計省費六百四十
萬圓云 因查義大利西班牙古稱富強之國今漸衰貧義大利
今年雖貸得鉅款而非貸諸本國將來必有流弊又聞希臘國入
不敷出本月向法國富商告貸未允又求諸英商英商亦卻之各
部大臣無可設法遂均奏請開缺埃及國則以所貸英銀四萬萬
餘久無歸結其政柄遂由英人主持此二國者於國中之利未見
其興徒恃借貸又貸諸他邦始也急何能擇今則顛而難扶西班
牙之及早圖維其謀國有足取焉 是夜金山來電云請電總署
力爭

二十八日晴

卯刻接金山電云案已提駁雖有公論彼以約准設法禁工爲辭
且有誤視寬大意察院現定本月十五號批斷氓心堅持趁機屬
田使電美毅爭必轉或電崔憲離美國體一振俾易就範決無意
外恐已斷定照行再商無及矣乞裁工商萬叩此電已電北京因
卽於辰刻發電云華商請電貴署撤因離美請示因上月美國
漁船水手自大東洋返美言在漁船捕魚泊俄國之格格桔格地
方上岸遊玩甫入俄境爲俄兵拿解至高萊蘇地方坐監又押至
琿春金壩處作工幸美國駐俄水師員聞知照會俄廷始釋又昨
日奧京來電言奧國議紳有產業在俄之保蘭省親往料理爲俄

地方官驅出境奧國政府現與理論云 因謹按昔孔子言柔遠
今地球各國立約均言和好其實中國仍守柔遠之經各國全無
和好之實也美國禁華工英法俄各國皆效之西班牙祕魯和闌
則招華人而又苛待之然猶曰此所以限制貧人防奪土人之生
計也乃俄國驅逐猶太人出境限制德人不許於俄置產驅逐奧
紳之入境料理產業者則又曰德奧聯盟俄人防之也美隔大東
洋向與俄敦睦誼俄之飢也曾運糧集資以振濟之固前日事也
乃不久而卽逐美之畫師擄祕林海之漁船監漁船之水手豈以
怨報德耶弱國出此有不興師問罪索賠者乎因固知無敢問罪
索賠於俄者也強也

二十九日晨起細雨辰正見日

二十七日奧京來電言奧國大軍按時操演以求精銳茲秋操之

期在邇

中歷五月即西歷七月

德國之君與俄世子均訂屆時至奧閱操查

俄世子此行實期與奧修好奧君亦願結好於俄俾以前相畏相防之心彼此消釋此舉有關歐洲昇平之局故德主亦欲與會云

因按古語云一日不朝其閒容刀然則好會之典匪僅以聯邦交亦可以消嫌隙也德奧義之君時時相見修好報不絕書德主又常迎見俄君於途往見英后於國較奧義之君尤爲勤慎非好勞也所處之地不同也其國介俄法兩強之間非結好奧義不能分支兩國非結好於英不能消法人之覬覦外修好而內增兵欲

戰則戰此形格勢禁之機也子曰知幾其神乎是故君子安而不忘危治而不忘亂是以身安而國家可保也易曰其亡其亡繫於苞桑其德君之謂乎

三十日晴

奉總理衙門電開來電悉同日接金山商董商有或電崔憲離美國體一振俾易就範等議查本署月初照會田使請其電外部暫緩行新例俟楊大臣到後再商初十日田使覆稱外部覆謂須俟按察司再核當可緩辦云該商所請目下無此辦法亦非工人等所可擅請至工商電稟應由使臣領事代陳逕電本署無此體制希飭禁卅當卽覆總理衙門電云總察院謹蓋力例者多仍行新

例又金山來電云聞判新例仍行黎稟當卽覆電云奉總署電以後金山工商勿再率電總署美察院仍判行新例因金山商董所延大律師阿士頓利亞頓來見言總統頗有廢例之意而察院不從察院共八人以爲當廢者傅爾斐路不綠瓦三人以爲不當廢者布郎不來之福穀磊矢拉矢截肱生五人惟傅爾等三人資深望重既謂當廢將來議院再議必有轉機云